

游历西比里亚，今由京都赴万里长城，由甘肃兰州、西宁前往西藏游历。

因谨按：前此但闻英、俄二国派人员游西藏，法未闻焉。今法亦接踵者，何也？盖法人得越南，其争西藏之力，可与英、俄抗衡。由老挝以达蒙自，阳则开通商之途，阴实开通藏之路。路可通矣，遣员游历者，所以深入而探虚实也。

十二日 晴。接北洋咨文，为容闳事。

英国铁路

英国大铁路二十三条，共长一万六千二百四十四英里并四分里之三，较去年增九十五里。近于一礼拜之内所收进款，共有英金一百二十六万九千二百五十二镑，较去年是时多三万八千九百五十五镑。

兴造铁路
裕国利民

因谨按：铁路之裕国利民，实无疑义。美国官绅尝为因言曰：“美自华盛顿立国，至今一百一十年耳。其富庶如此之速者，铁路之力也。自铁路通达东、西洋，而土产遂通于欧、墨两洲而无弃于地。美之民数，前二十年仅三十馀兆，今则六十馀兆矣。利之出于地者日增，民之归于美者亦日众，此明效大验也。”

十三日 晴。照会容闳。

小议容闳

因谨按：年少学生出洋肄业，诚良法美意，然非其人不能行也。哈富学堂耗国帑甚巨，而不能培植人才。肄业学生，皆改装入教，一无所成。容闳又身入美籍，以中国之学堂私行质银，不能正其身，如正人，何此之谓欤！

十四日 晴。北风。西人名忌里奋者，卓犖超群，熟